

In premi per l'um dal granezza

Peer Schilperoord ha retschavì il Premi Bio Grischun

DAD ANDREAS CADONAU/FMR

■ **Per sias stentas a favur da la cultivaziun dad ers en muntogna è Peer Schilperoord vegnì undrà la gievgia passada cun il Premi Bio Grischun 2020. Oriund da l'Olanda è il biolog sa fatschentà durant decennis cun sorts da granezza dal spazi alpin ed en spezial dal Grischun.**

A chaschun da la radunanza da Bio Grischun la gievgia passada al Plantahof a Landquart ha reschavì Peer Schilperoord il Premi Bio Grischun 2020. Dapi l'onn 1982 viva e lavura il biolog oriund da l'Olanda en il chantun Grischun. E durant quels onns sa fatschenta el cun sorts da granezza adattadas per la cultivaziun en la muntogna. Ina cultivaziun tradiziunala ch'ha servì durant tschientaners al provediment da la populaziun alpina. Ils ers da granezza en muntogna è vegnids remplazzads pli e pli da la tratga da biestga, principalmain suenter la Segunda Guerra mundiala. Cura ch'il giuven biolog Schilperoord e vegnì l'onn 1982 en Surselva, eran bleras sorts da granezza svanidas u curt avant svanir. A Riein, respectiv en l'aclaun da Signina, ha Schilperoord cumenzà a cultivar granezza, sorts veglias e novas. Sa chapescha senza duvvar pesticides, la cultivaziun ecologica ha interessà il biolog dapi l'entschatta da sias activitads en il chantun Grischun. Ed interessà il biolog ha medemamain la gronda varietad da sorts localas dal tredi, furment, seghel, dumiec, tirc e dal tartuffel. Sias en-

conuschentschas dal svilup da las plantas han chattà la via en pliras publicaziuns dal fatg e Schilperoord ha scrit dus cudeschs che tractan la metamorfosa da la planta cultivada.

Gestiunari da Gran Alpin

Da l'onn 1991 en fin l'onn 2000 è Schilperoord stà gestiunari da Gran Alpin, la societad che promova cultivaziun e vendita da granezza indigena ed ecologica. Dapi quels onns crescha la surfatscha dad ers en las muntognas grischunas puspè. Sias enconuschentschas emprova il biolog - che viva ad Alvagni - d'intermediar a la publicitad via in'expoziun ambulanta che tematizescha la varietad da la planta cultivada. E via in med d'instrucziun en elavuraziun da cuminanza cun la Scola auta pedagogica da Son Gagl. Per ses engaschi a favur da la ierta culturala ed economica ha Schilperoord gia retschavì in Premi da renconuschentscha dal chantun Grischun ed il Premi Rudolf Maag.

E la gievgia passada è el vegnì undrà cun il Premi Bio Grischun. Nominads per quel premi èn stads - sper Peer Schilperoord - la Chascharia Val Müstair ed il manaschi da bio Duscha, il qual fa lavur da pionier da mazzar la biestga sin il manaschi. Cun la distincziun undrescha Bio Grischun dapi 16 onns persunas ubain instituziuns che s'engaschan per l'agricultura ecologica en il chantun Grischun.



Ha cumenzà a cultivar granezza alpina avant passa quatter decennis en Surselva. Peer Schilperoord vegn undrà cun il Premi Bio Grischun 2020.

FOTO A. CADONAU